



Directivas concernent la procuraziun d'in extract privat e d'in extract privat spezial a las scolas popularas, a las scolas professionali spezializadas ed a las scolas medias sco er a las soluziuns transitoricas en il chantun Grischun

Sa basond sin l'art. 98 da la Lescha davart las scolas popularas dal chantun Grischun (Lescha da scola; DG 421.000), sin l'art. 6 da la Lescha davart las scolas medias en il chantun Grischun (Lescha davart las scolas medias, LSM; DG 425.000) sco er sin l'art. 10 da la Lescha davart la furmaziun professiunala e davart purschidas da furmaziun cuntinuanta (LFurm; DG 430.000)

relaschadas dal Departament d'educaziun, cultura e protecziun da l'ambient ils 1. da mars 2021

Art. 1

¹ Questas directivas valan per ils purtaders da scola da las scolas popularas, da las scolas professionali spezializadas e da las scolas medias sco er da las soluziuns transitoricas en il chantun Grischun (scolas professionali spezializadas e scolas medias purtadas dal chantun e scolas medias privatas sco er soluziuns transitoricas inclusiv chasas da dimora che vegnan manadas dad ellas).

Champ
d'applicaziun

Art. 2

¹ En il rom da l'engaschament da persunas d'instrucziun, da persunas d'assistenza e da persunas spezializadas sco er da commembras e commembers da la direcziun da scola èn ils purtaders da scola da las scolas popularas, da las scolas professionali spezializadas e da las scolas medias sco er da las soluziuns transitoricas en il chantun Grischun obligads da pretender da las candidatas e dals candidats in extract privat ed in extract privat spezial, e quai avant la decisiun d'engaschament. Ils extracts ston esser avant maun en l'original, ed els na dastgan betg esser pli vegls che 3 mais il mument da l'inoltraziun.

Procuraziun d'in
extract privat e
d'in extract privat
spezial

² L'extract privat sco er l'extract privat spezial na vegnan betg agiuntads als documents d'annunzia. La candidata u il candidat sto procurar l'original sin agens custs e preschentar el tenor las instrucziuns dal patrun, il pli tard dentant avant la decisiun d'engaschament.

³ Sche la candidata u il candidat vegn engaschè, vegnan l'extract privat sco er l'extract privat spezial mess en il dossier dal persunal.

Art. 3

¹ Exceptadas da l'obligaziun tenor l'art. 2 èn relaziuns da lavur che na duran betg pli ditg che 8 emnas.

Excepziuns

Art. 4

¹ Questas directivas entran en vigur il 1. d'avust 2021.

Entrada en vigur